

Abstract

Bogns da cura – lieus per restabilir l'urden da las schlattainas

Enturn il 1900 prosperavan ils stabiliments da cura en l'Europa ed en il Grischun. Bliers giasts vegnivan era a Passugg per far ina cura da bogns e da baiver. Tranter ils lieus da cura devi ina gronda concorrenza. Ils hotels da cura investivan enormas summas en l'infrastructura per satisfar als basegns da la clientella pli e pli numerusa. La finamira d'ina cura da bogns era da restabilir l'equiliber psychic e la sanadad corporala. Bliers umans a la sava dal 20avel tschientaner avevan malsognas ch'exprimivan lur problems da s'adattar a la spertadad dal temp ed a las cundiziuns da vita midadas. Las dunnas pativan da l'uschenumnada isteria (numnada suenter la «hystera» [la madra] che contribuiva, sco quai ch'ins crajeva, a questa malsogna), entant ch'ils umens pativan da l'uschenumnada neurastenia (flaivlezza da la gnerva). Il svilup ed il tractament da questas malsognas da la gnerva giugavan ina gronda rolla en la discussiun scientific-medicinala da lez temp. Questa discussiun è vegnida enconuschenta sco «discurs davart l'igièna». Sut «igièna» na chapiv'ins quella giada betg la schubradad, mabain il mantegniment da la mesira en tut ils secturs. En la vita «moderna» n'eri dentant betg pussaivel da mantegnair la mesira e perquai stuevan, da questa optica anor, adina dapli umans vegnir malsauns. Spezialmain inquietant era il dumber creschint dad umens che pativan da neurastenia. Cun ses sintoms, che tanschevan da la gnervusità fin a l'impotenza, ha questa malsogna mess fermamain en dumonda il maletg da rolla da l'um e sia posiziun a la testa da l'urden da las schlattainas. L'um è daventà la «schlattaina malsauna». La dunna valeva «da natira» sco la «schlattaina flaivla».

La cura da bogns è sa sviluppada al therapeuticum ideal, gist per las «malsognas da moda», l'isteria e la neurastenia. Ils hotels da cura purschevan tractaments differents per umens e dunnas. L'exempel da Passugg mussa co ch'il medi da cura da lez temp, dr. Jakob Scarpatetti, ha reagì sin la discussiun davart umens e dunnas malsaunas e co ch'el ha adattà e modernisà – sut squitsch dal cussegl administrativ da la Funtaunas termalas Passugg SA e pervi d'in concurrent – il tractament dals umens e da las dunnas. Il stabiliment da cura n'era damai betg mo in lieu da tractament per ils individis malsauns, per las singulas pazientas ed ils singuls pazients, mabain il lieu, nua che l'urden da las schlattainas tradiziunal vegniva restabilì. La cura da bogns rinforzava l'um ed al relaschava en sia rolla tradiziunala sco chau da la societad, entant che la dunna cun ses bassventer curà era puspè abla da parturir uffants sauns, quai che correspundeva a sia «destinaziun natirala».